

夜  
雨  
秋  
燈  
錄

夜雨秋燈續錄

天長宣鼎瘦梅齋

樊惜惜

宣化靳生因貧游當道幕嘗隨居僦入都道由慶由坊學勾  
坑雨鈴風瓦檠燈火雖東南相對殊覺寡歡居停戲請生去此  
邦爲蝶裙窟宅如不嫌鄙俚當招致一二艷供君釋慮惟恨北  
地胭脂遠遜南朝金粉先生其有情乎生笑云酌葡萄酒聽楊  
柳枝旅人事也客邸淒涼閑情亦當居停略頤指卽環佩丁當  
粗斂膩粉翩然在前有名曰大喬妹者有名曰小玉姊者有名  
曰隨意綠可憐紅者就中翹楚如鶴之立於雞羣則樊家兒名  
曰惜惜芳年十七能吹玉笛能歌小促刺是謂妓中之巨璧俄  
頃酒陣張華燭燦觥籌交錯歌舞盡歡彼雌之媚雄惟恐不工

惟爭媚老公惟愛其宦橐豐惟得其情濃與之從容或可以禦窮而惜惜獨留盼生時向生耳語生礙居停在座惟小酬應惜惜又潛拉生袖以纖指在生腕中書一宿字生遂顛倒幾不能自持居停慰藉雜以譏彈生傾一大白酒濡沾衫袖作大聲曰賤子狂態作矣我醉欲眠卿且去耳女應聲指庭前大柳曰樹猶如此人何堪兮居停亦賞其靈敏笑傾一觥生口占一詞云飢驅午後逐牛慵落拓負春風折得一枝柳色縮人別恨忽忽女又應聲續曰文魔秀士捋詞若錦吐氣如虹一任東皇冷落尊前且復憐儂居停本資郎文義未了了亦浮誇浪贊博蓮幕歡女勉之曰郎君珍重今日游士明日貴人指顧間耳生云落魄之夫未審貴在何日時曙鼓將鳴村雞唱曉笑遣之行與人起催促扶上征車昏然睡去殆醒已在前途回憶情人頗難捨

割忽覺身底有硬物。墜腰際。摸索視之。一白玉佩。鑲作同心藕片者。始知惜惜。昨夕假倚時。潛繫之。以示情也。明年春。隨居停南返。途遇鄉人。將投營帥。麾下遂辭而借之。往覓於上將之前。得稱揖。客搖筆。艸露布倚馬。常萬言。帥喜呼爲奇才。事事倚任之。羈滯二載。果以軍功。登剡章授職。大令旋擢太守。遂又辭去。聽鼓於浙之省轅。其中丞某亦風雅士。愛其才長。必工製錦。遣之覲上方。行當授大郡。生以阮橐對中丞。掀髯笑曰。殺人見血。救人救溺焉。有送佛而不到西天者。耶。適案吏以牘呈。請邊選。幹吏解京餉計十萬白銀。中丞卽檄生置酒。與餞。勸駕甚殷。曰。此役頗苦。辛任頗重。太守當謹慎從事。毋踈虞于戾也。生拜辭。驅車北上。重到腰。踰夏末。秋初。炎威未却。而俊僕怒馬衣裝甚豪。回首伊人。宛然在目。但不知向日鍾情者。桃花人面。猶得重

逢否飯已着白裕衫烏靴羽箆矮几納涼坐視人役陸續以銀  
匣進疊疊堆室中幾遍惟東邊一屋打頭僅容下榻其匣乃解  
木爲二刻之使空中實以銀而外綰銀絙者一匣一千兩定數  
也事已生笑語店主人云此間有樊家惜惜否店主未及答而  
美人已入着芙蓉紗衫紅裙綠袴褶梳懶髻簪茉莉夜來香薄  
施脂粉眉黛含情似有喜色冉冉俠拜於前驚晚之果是惜惜  
舊雨重逢古雲再見爲雲爲雨之神娥宜其喜也生大樂手爲  
之舞足爲之蹈曰惜娘更艷於當年耶女喜曰靳郎真貴在今  
日也携手入室出佩玉示女女笑而佩之於襟旋以盃酒敘情  
酒闌生悄謂女曰惜娘若真憐下官涼夕新秋未知能真個銷  
魂否女笑曰措大情急了耶昔依劉欲銷魂而苦無由兒雖毛  
遂魂欲銷而有所畏今郎已貴兒尙嬌渡鵲橋可憐宵鸞鳳交

焉能逃請魂銷生亦應聲曰胸誤矣乃共愁魂小不禁銷也遂自起扃其扉與惜惜解衣入幃玉肌乍露竹簾皆香朗照銀燈玩其顏色正偎倚悶忽聽中堂銀匣響如爆竹之暴裂其聲驚心乃推女而起自抽床頭劍女亦起代秉紅燭走覘之果一匣自堆上旋滾至地匣數尙無舛遂又掩關抱惜惜登榻乍乘玉體未及解鈴忽又奇響旋寂側耳聽之亦烏有遂恣情狎焉歡未已而響聲大作乃偁而起惜惜僅着一綠紗禪粉胸紅靨袷燦然如着雨桃花鮮妍欲滴掀幃拔關出視銀匣已失位次一匣猶旋滾不已女跨而騎之始大呼奴僕店主紛至女已騎之殆遍生告衆以聲響之異驗之綰鐵無恙而響亦旋已心知其異亦無如何也聽街柝方轉三更仍麾衆去與女再眠始大遂所欲晨起生謂女曰兩載相思昨宵始釋其如朱提作祟竟教

紅粉驚心僕擬小駐征車卿可重游巫峽女曰不可郎初登仕  
版奈何以兒女私情竟誤功名大事此間素多術人昨宵聲息  
今起尙惴惴也卽請前進良晤有時生曰善出呼人役以極大  
權衡至稱之輕重皆符女送之登輿麟麟竟別抵京都以牒投  
戶部樞曹長官登堂皇驗收胥吏咸鵠立三健兒出利斧燬其  
匣內有一匣銀如故惟多黃紙硃書符籙一通駭問何來生不  
敢隱直陳腰跼夜驚事長官笑曰是兒不可須也國家重帑若  
拋撇恐太守不但削職且喪元矣行路之難不良可怖乎生囁  
而出明日覲天灑得天子溫語舞蹈感激叩領訓辭竣出都履  
腰跼重訪玉人則已爲大力者攫去乃懊喪曰不圖佳人竟歸  
沙吒利也行至竹田間太守系鄉人某公與生有葭莩戚訪之  
卽款之署急切不得行偶從案頭繙閱民詞見有大婦訟小婦

者乞就勘視其名則惜惜也恐其同名無從問訊明日庭訊竊  
從屏後窺之果然而憔悴形骸已非舊日急草一箋與太守曰  
惜惜是我表子我是惜惜搗子望太守留點關子太守遂問惜  
惜曰汝知有斬大夫乎惜泫然曰兒舊識也因口吟一詩云柳  
條攀折損柔枝風雨摧殘異昔時未識西湖賢刺史多情還贖  
舊樊姬太守劇賞諭曰爾旣識斬大夫尙見之乎泣而叩首曰  
兒所日夜思之者也爲鴛母賺至此鬻商賈爲妾大婦妬不容  
蜚語陷之乞太守恩鑒明日果以官價酬身值肩輿送至畫舫  
偕之浙初爲司香人適冢室殂遂策爲正一時賓客寮案咸謂  
太守德政得樊夫人內助者多旋升方伯女多病苦不育泣謂  
生曰妾究以腰跼抱琵琶媚行人過受辛苦疾已糾纏願爲耶  
置妾勝以廣宗嗣後果以妾子爲子壽六十七得與生偕老歸



田園視兒輩成名封夫人昔生在宮待幕賓最厚女惟諫夫毋  
禁娼家噫中途狎妓不肖者之所爲有識者之所不爲而斬大  
夫竟以狎妓得保其官階全其首領亦何其奇哉至惜娘能識  
英雄於未遇之時似亦生有俠骨者當不與尋常粉兒伍術人  
能使之懼正術人故爲之媒

唐玉環

渭水之濱樂生名古春字子雅訓蒙於裴氏別墅清池曲沼翠  
篠幽蘭正當書牖伊唔之暇吟詠徘徊往往抒長嘯可以驚魑  
魍裂金石焉一夕玉兔流輝棲鳥倦宿遙見有人影一雙徒倚  
綠楊樹下促視之乃兩麗人携手微步雲鬢高髻不作時世粧  
杏眼櫻唇頰露旖旎一衣淺絳殿綃之服一曳深紅蛺蝶之  
裙皆通幅繡梅花文或龍文龜板愈形嬌艷生微靨以嗽女似

不聞惟攀條顧影宛轉作歌絳衣人歌云產嶧陽生空桑能引  
鳳工求皇響泉寒玉鏗繁霜山自深水自長一朝捐棄守空房  
薜荔牆芙蓉裳鏘鏘黯黯自傷生愀然曰安得此淒惻之音也  
又聞紅裙人歌云粲梅文遏松雲傲漆吏名桐君朱絲綠綺碧  
玉裙電母雷氏知我心棄而不御逸韻沉苔之陰山之岑吟吟  
吟到如今生聞之擊節曰異哉詞愈好而心愈悲何處佳人愁  
怨乃爾言已遽詣女側揖而致詞曰神仙麗偶下降蕭齋濁士  
塵勞敢不下拜二女亦不驚避雙雙檢衽云妾之姊妹俱是常  
媛并非仙偶何勞秀才足恭近託比隣因偶爾乘輿步月至此  
不期得遇秀才生云乞轉雲軿暫憩斗室青甍一片當三日香  
也因邀之入闥挑燈就坐生視容態艷潔均所絕倫珠采有光  
照耀鄴架虹文煥美彌滿馬幃有態必柔無詞不俊絳衣人自

云陰姬名鳳來紅裙人自云陽姓名鸞來幼本中表姊妹行長  
更結隣金閨契洽今夕邂逅殆是宿緣生云賤子福薄敢冀英  
皇卿等情多當聯屬戴若望隴蜀未免自笑貪衷然妍鬪尹邢  
曷不俯全博愛鳳笑云長枕大被何殊悌弟之情一鶚雙鴛轉  
失于飛之好請分事君子免爭夕也妾請先行言已翩然一笑  
欲追挽之而蓮屣細碎之聲已隔修竹生遂掩關與鸞來狎昵  
抱璞含苞居然處子已而以譬代枕眷戀尤殷聽隣雞乍鳴卽  
於枕上着衣忽忽而去欲留之須臾曰恐家人見跡再晤僅隔  
宵耳次日掃榻整袖以待陰氏方孤藥擁卷忽聞有扣環聲急  
啓其扉一女掩入綺羅環佩眉目動情然絕非鳳也而妍麗之  
姿亦與之伯仲生方欲訝問而女郎遽駭然曰書生何來曰此  
書生下榻處僕不問卿而卿反訊僕耶曰妾以爲司空侯氏阿

姥家今悞矣請卽去生持其裾曰旣來之則安之耳豈有客邸  
淒涼深宵風露而視卿煢煢獨行且宜少憩俟氏姥俟自有居  
址過訪請以明宵女薄怒微曠旋自失笑已復粲然自云唐氏  
小字玉環生笑云人云環肥卿何燕瘦總之增一分則多減一  
分則少也小生何修得美人下顧言已堅抱於懷迫之荐寢女  
不得已從之其羞怯婉變宛似昨宵玉人殆亦處子枕上謂生  
云妾家伊邇朝夕過從此時且別恐天明則蹤跡顯露爲歡不  
長也生請後約對以三日後送之出門方倚枕默憶其餘香牋  
粉描繪於衷忽又聞叩戶聲竊意鳳至喜而納之覘其顏色則  
昨宵玉人又翩然來謂生云鳳來姊赴雲和主人約萬不獲辭  
恐那久候故倩妾代庖拜非越俎遂又留之喜就燈下玩其眉  
黛彎青雙頰帶赤曰令姊信人也今旣見卿殊可解渴亦不復

憶渠矣鸞來微嘆以目曰吾姊妹均以真心事郎奈何作薄情  
語若不憶渠妾亦行矣生遜謝方已次夕鳳來果來則低鬟掠  
鬢長袖輕裾幾幾若不勝衣臨風欲化也與生歛狎亦復恣情  
不知東方之既白乃掀被起卽飄然去生私心慶幸以爲措大  
微倖一時得玉樹三株再夕唐氏女至曰昨侍君子得慰生平  
因成小詩五章以誌奇遇言之汚郎耳否生狂喜索觀乃袖出  
一松花箋字跡端麗詩曰阿儂何故號緊婆歷損春山蹙斷娥  
自信此身猶處子細腰幾見腹翩翩傳聞鐵騎度陰山親送明  
妃出玉關雁影一繩沙萬里許多嗚咽淚淪潛司馬由他別意  
傷一聲淒切楚天長玉顏憔悴無家別多少嬌羞替掩藏御院  
名旌繞峻雷上方側耳把金盃如何又轉砌瓜苑曼攏輕撚弄  
一回撩俏曾隨關小紅回頭盼斷醉春風妾心堅似苔陰石知

在幽蘭第幾叢生贊譽不已筍而藏之是夜綢繆愛憐臻至天  
甫明旋即辭去由是數月皆燕去鶯來毫無舐觸一夕風鸞二  
女聯臂而來笑云娘子連營能令壯夫破胆否生亦笑曰寡人  
好色何懼二女同車乎言未已忽有排闥而入者視之則唐玉  
環也二女曰淫婢何來曰來窺貞節姊耳三人頗衲鬢各相齟  
齬生調停其中意驚魄駭莫知所云風利口雄辨鸞巧語譏彈  
玉環以一吻敵雙艷怒曰淫婢自大盛氣凌人龍門之望雖豪  
焦尾之傷亦憊若吾唐氏中虛外實傳元之艷賦流傳抱月裏  
風王融之新詩刻削植十二柱以配律呂抱七二絃而燭幽明  
所謂穹崇法天旁薄象地者無上品也而乃睽別畫筵飄搖家  
室侍檀槽分淚掩曳金索而音酸爾姊妹何藐我真媛而呼爲  
淫婢耶二女笑云哆口誇張亦何可醜吾家祖自神農見於周

禮文人學士與臺婦孺罔不周知何須炫汝惟汝鳳頸雖榮龜腹殊陋僅名一月之半無怪千日難成伴仙人呂阿香終歸縹緲隨老妓花褪紅何其卑汚淫賤下流呼之允當吾以雅抗俗豈是想當然汝以賤凌尊何其渾不似玉環聲吞氣結撫几而啼聲極慘痛且欲投壁自戕其身鸞冷笑曰昔戴氏對使投吾於階鳴高志潔而妮子亦妄欲效顰何哉生窘急長跪於中哀之曰卿等相執何以處小生風乃含笑而起褰衽而前携玉環縈手曰妹子性急同姊不過與妹戲耳鸞亦謝罪曰妹兮妹兮吾兩家支派雖然小異譜牒自當會聯本是同根何妨弃蒂耶使彼萬人莫得暢歌三婦豔也豈不妙哉生從旁又笑慰之玉環始歛怒爲喜拜曰姊如相容願充妾媵乃歡聚而散無暇言歡生出而微叩居停聞左近有陰氏陽氏唐氏否則殊未闡心

頗疑而不敢語一夜忽三女魚貫入皆鎖眉斂態楚惻難堪生怪之曰與郎緣分盡矣問其故不肯言因泣下生亦泣問此後猶相見否三女曰不見如見見如不見方是真見鳳曰郎與我輩交未免受陰氣太過某歲之冬必病病必頹唐因引口嘔出一虫狀如碧蠶紅蟬錦紋翠質置掌心蠶蠕盛以玉盒授生曰郎宜秘之此虫和藥搗而服之却病且益智遂灑淚訣去次日主人修假山工人於碎石之下掘出古琴二一鐫文曰陰姬一鐫文曰陽娃又得琵琶一鐫文曰玉環蒸唐睿宗舊製也生洗濯置之案頭反復摩挲始知玉人皆是物精靈乃星月所被能化形爲幻者淒然淚落主人怪之詳言所以主人素豪毅然以此爲贈拜謝携之歸盛以錦囊裹以香屑朝夕禮拜祝以神明之敬夢寐常通申以夫婦之私而古質斑斕玉容竟杳年餘夜



忽有大盜入室皆卹首繪面呼嘯而來不索金資不搜衣帛僅攫二琴及琵琶而去生慟極魂銷如喪其偶翌夕三女入夢曰兒輩向在君家無益於君徒召奇禍彼繡戶朱門得吾亦恐不吉曷若捨無窮之愛割有象之情生不同牢死當同穴耶宜珍重寤而偵訪則爲一大宦以千金買於綠林旋籍沒遂又流落外間展轉鬪鬪垂十餘年無問鼎者生是時果病出由於玉盒中示醫云此鞠通也生千年古琴中音能自奏雜他藥服之果瘳心跡明澈文思如泉旋以明經入成均偶游通衢重觀故物傾囊購之回高懸雕梁深藏秘笈目爲異寶奇珍從不輕示友生忽一夕暴病且殂家人輩泣遵遺言以之爲殉

慎農氏曰陰氏陽氏古節古音其譜系綿長偶爾口角同流絕不聞一誇語而玉環小婢生於李唐卽冒唐爲姓嘖嘖喋喋上

數家聲妄思壓倒豔偶其俗可知此桐氏之族所以大也說林載鞠通練色虫喜食梧桐尤愛古墨置聾人耳邊少時卽愈樂氏之疾宜其瘳也然究不可以延壽考想戕賊已久雖有絳雪神丹亦不爲之續命彼世之曬烟花而忘身者可不懼哉可不懼哉

### 玉猿翻筋斗三個半

客有海邊貿易者歲暮將歸淮陰在鹽濱市上以青紙易白銀共十餘枚巨鏹也另有零星者又二十餘兩肆主交易畢書白帖加封鈐與之所以明會計也客卽以帖包零星出肆藏之篋而加鑄且封將行突有童子自身後掩出驚睨之童子去遂呼僕昇銀出城而登船解纜行甫十餘里岸上有一獨行男子青鞋布襪形質頗文肩負衣囊手持雨蓋因與拉縶縵者近殷殷

夜雨秋燈續錄

卷四唐玉環

玉猿翻筋斗三個半九

閒話自云久客古鹽家在淮安歸而度歲舟人云男子妄矣前面三十里卽有水蕩三四處泛濫如湖若徒步行可飛渡耶曰噫吾向由竹西來故不識路徑頃將奈何舟人云曷搭吾舟男子喜因與之訂值呼船攏岸引坐船唇客見其文弱與之話風景說生涯意頗殷勤卽延入靜對篷窗分與餐飲明日午後男子偶自橐中檢出小玉猿一鐫刻如生長僅寸許置之掌心自能翻筋斗如轆轤之轉靈妙非常客意奪睛炫乞借一觀卽慨然送至掌中授以口訣呼之亦能運動僅翻筋斗者三其一已俯其首忽仰倒若僵眠焉男子遽攫而囊之曰此吾家世守之至寶也毋誤墮損壞客歎羨不已罔測其原少頃日墮行至車橋男子出船值酬之起揖客曰猥蒙挈帶感切寸心某卽此間人也湫溢之居不可辱長者車轍乞停橈少憩某有不覯之儀

聊以將敬幸勿却焉客笑頷其首因躍上岸而船仍不繫倏忽里餘一童子追至呼曰某客船耶舟人應聲曰然曰某男子感某客高誼以土物獻遺我送將來取而視之乃一小篋篋中實以糖糕外糊以白紙意在辭璧而童子已如飛而去至夕啓其篋意嘗其旨否駭見鹽肆換銀帖子不知何故在其篋中自啓銀篋視之封誌如故也竟失去巨鏹者零星小件者又二十餘兩始知玉猴翻筋斗即攪銀幻術每一翻轉即一鏹攝去尾翻其半故亦去其半帖因包之俱去故借齋送至以自明其神或恐貽害舟子客乃大懼喪回至車橋密訪其人竟成烏有先生矣噫奇哉

### 金婆

萊陽之野有陳非平者幼習農與兄嫂同居兄賈於外郡嫂孕

而在室陳一日耨於東臯將種荳嫂笑守門日將落有白髮老婦人跛而來自云金婆楚人投親串不遇前途多虎狼願借娘子宅中宿一宵晨即他去餐宿之值不吝償也言詞頗淒惻其嫂見是女流又衰邁憐而允之即廚下炊飯與之饌竈下藉藥與之寢出家無燈室中漆黑陳荷鋤歸嫂問叔餐乎曰途遇前村中表某約晚飲已飽豆羹矣因自掩扉就東壁土坑上宿嫂聞叔回即摸索掩房闔隔牆與叔談家事忽竈下有鼯聲起陳驚訊伊誰嫂以投宿婦告陳因披衣起敲石然缸走視果見此婦仰而臥鼻咻咻然喚之醒問踪跡婦意似驚亦自云金婆如對其嫂語以語陳知非善良然嫂已孟浪留之深宵曠野遣將何所適警之曰第安眠天明速去吾輩莽男子也爾慎毋萌異心婦笑曰一介女流諒非能作盜賊者二耶何恐嚇老婦言

已眼復闔陳展衾復臥不敢遽眠姑閉雙眸故作眠態以覘其變二更許聞婦在艸上理衣慄然起步至神龕前喃喃咒一二語龕前雙燭奴之杪忽炯炯有白光二亮如銀蠟照婦面龐極清極朗婦向神拜拜且禱旋起又望陳拜陳似昏然不語強持之婦探懷出小樹枝一就光上然之卽又亮如燈檠持向嫂之房門首向門三揖忽錚然自開飄然已進其闔陳急起驚步陰隨其後匿門隙見婦又喃喃咒移時向帳一揖帳自挂起又一揖嫂卽坐起形狀痴迷昏然瞠目無一語再揖則嫂自榻上躍下地自去衷衣露其脰腹陳方駭異欲號婦颯然亶袖中三寸小匕首齧剖嫂腹腹裂血湧胎墮地躍躍然已成嬰兒形婦笑曰王母千年桃木公一顆棗何必分陰陽是爲無價寶俯而拾之陳自後堅抱其腰視嫂始倒地死婦似不懼第從容云金

丹已在吾手爾嫂終不得生二郎怒吾能使二郎富時天已明矣陳竭力狂呼隣人無老少男婦持械至婦又堅握其胎不肯釋縛之陳亦昏暈兩股血殷然蓋婦以匕首槌之使釋受創重耳衆救之甦聞陳歷歷述其幻惡衆怒恐離城遠報宰官反滯延卽倒懸於大樹枝上環守而防其逸三日夜不呻吟面色如敬衆又以荆條環撻之血肉飛白骨現腸胃將傾而猶不死次夜有惡鬼二一持鐵戟一執銅戈奔至向衆直刺衆中有胆力者械而與之鬪執之忽變爲紙人微有血跡火之尙啾啾然婦至是始哀衆曰吾斷不得生矣乞解吾行纏足心有膏藥二揭之可耳衆如其言果斃

牛頭

潘大允以屠牛肥其家幼習操刀宰割大武不下千餘頭居東

郭華屋百椽沃產千畝猶不釋舊業一日自城中醉歸途遇東鄉老農牽一牛走郭門外極肥且碩因思此若供吾割得利必豐甫歸村一舉首回顧見有牽牛自綠樹邊遠遠來者大喜走覘之卽郭門所見之農堅約至家留以餐飲藉以少憩農以素未謀面覩覩固辭潘云行人倦矣卽尊畜亦當飼以水艸不得已從之繫牛於樹登其堂午餐至極豐飪酒亦芳烈且談且飲意已微醺潘出潛以大鐵釘四釘其牛蹄使之卓立而不能臥旋入搖之醒曰君可歸矣不然日且下春也農起而揖謝出牽其牛惟嘶鳴流淚一步不肯行怒而鞭之狂呼嗚嗚恨無介葛盧能達所苦農亦焦燥面汗百計莫施潘僞覘而異之曰牛病矣當是走急受暑矣曷以牛醫來不過多擲數百錢卽可瘳也呼牧兒以醫至潘目視醫頭爲之動醫窺測其意卽詭言牛當



暴斃莫可救延農大哭曰吾以牛入城將變價以償逋負者今已矣吾何生焉潘貌爲慰藉私攝醫袖醫云伊牛曷賣於足下好否笑曰吾得此將斃之畜何用曰殺而貨其肉卽皮角尙值半千錢耳何云無用潘故示憐憫曰卽煩君定牛值因與農議酬以四千文農無如何哭而持之去是夕卽磨刀霍霍斬牛頭以絙挂大樹之柯遣兒輩開剝潘得意已極潛謝牛醫痛飲泥尊仰臥竹榻晨起已無全牛矣卓午與隣人閒話生平快活事而坐大樹下頸忽微癢就地取牛刀肘而微刮以代爬搔忽涼颼颼至樹枝動搖牛頭絙斷適墮壓刀背上潘之顛脆似瓠落矣其子以麻綫聯貫之棺殮如禮將殯忽火起中堂棺成焦炭明年前牽牛之農家老牝牛已瘠且疥忽壯健與雄者交產一雛極馴擾年餘教之駕犁且孔武有力一日能耕五十畝地隣

人多備之以是得資將近百餘牛忽狂以角觸農子幾斷其脰怒而殺之皮褪腹露朱書一行云神所書告世上殺牛蠻牛大允允當噫世風不古詭計陰謀豈獨一牛屠潘大允哉然而神書可鑒也

見錢眼開

東流有狂生某善吟詠能詆譏諸東隣富奴某擁數巨萬資而生性貪鄙生與之對門自署門聯云他有幾貫錢不思積德衆叛親離他本不該認得我我讀數行書惟知克己天空海闊我又何曾看見他富奴見之亦不計較一日偶患目且殆一僮扶之宛像瞽者生趨問且笑富奴告以所苦并云將往尋東村某醫治曰無須某最工岐黃術汝不知耶不須遠求汝但市黃連二錢煮濃汁服之市冰糖一勺撮而銜之口莫遽吞咽再以青銅

錢蓋眼之胞臉偷從錢孔中仰視星月一夜卽瘳富奴如其語  
病果已具金帛往謝笑而麾之人問何術本於何書笑曰公等  
不知耶此名嘴甜心苦見錢眼開耳問者皆捧腹是年秋富家  
一亭環植花草其景甚幽富奴常挈友朋觴聚其中忽有魅占  
居之人有誤入者多發狂而斃遣奴子往聘巫來逐生聞之毛  
遂曰吾固工醫且善巫驅鬼怪向有奇術汝何信章丹陳珠之  
流而藐忽書生富奴德其術神愈信其說延之往問所需曰吾  
所需自携二僮開尊暢飲三更僮欲垂頭而睡魅果出覘之乃  
一大臉如巨箕突從東壁上現其白如雪其眉如帚其目如斗  
嘻笑歡頰張口吐舌穉穉之齒如碎石排衙生笑云好大臉呼  
僮左右提其兩耳袖中出自作窗稿一本朗聲誦與魅聽魅遽  
愁苦搖首似不願聞命兩僮堅執之毋使逸誦聲大作愈誦愈

高至極妙處則又頓挫激昂淋漓盡致魅緊閉雙目吁氣不休  
生怒手批其頰橐橐然如敗鼓之皮批至十餘下大臉忽耷下  
當一聲乃一枚小錢墮地耳持示主人主人云有是哉曩遵先  
生妙法治賤恙不忍用大錢取茲藐小之榆筴以代刀圭誤墮  
亭中摸索終夜不可得詎知是物爲祟哉聞者又捧腹不置然  
由是魅竟絕富奴每於月夜張燈與友朋飲其中必笑云吾不  
忘狂生德噫嘻奇哉狂生兩侮富奴皆利於彼而無損於彼人  
亦何樂乎以狂傲凌人損己盛德狂生侮富奴正富奴容狂生  
耳青青子衿當以之爲戒

坐地虎

平阿某公以刀筆鳴於鄉人畏之名曰坐地虎嘗投狀於宰曰  
邑之兩猾某某是日其一以白布纏頭鳴鑼上莊連傷二命其

一手執長戟刺殺生之老母宰大驚怖人役呵導而來莊殊寂然虎冠服出迓意亦閑閑宰問連傷何命及爾母尸骸何方候驗乃佯驚曰生母安健長官何語出不祥宰怒語以所投狀乃啞然失驚曰小事耳其日一賣錫者曰布蓋額以避日光賣錫人例擊小銅鑼至生莊失足誤踏殺雞雛二耳其一村某持長竹放鴨生所豢豬適當鴨羣鴨驚飛某怒刺殺生豬乃刺殺老母豬也筆下誤落豬字有驚長官不淺哉宰怒其戲謔無如何切齒而去然性最侃直見不平事即捉刀非理事從不秉筆一日至屠肆貨肉屠某戲語虎曰公善告人如某無罪民若能以一紙即拍某臀當酬以彘肩一酒十斤即莞然曰與爾無隙何苦楚爾曰姑以之驗子之技應則如許酬否則某且拳子虎應曰諾翌起即草一狀投宰曰生是日正閉門讀書忽聞有扣戶

聲且厲啓視之某屠索肉值也生家狗惡其貌兇吠狺狺某橫以鈎豬之鈎鈎狗生略禁止後以鈎狗之鈎鈎生猶可惡者臨去罵媽陰戶三字宰闕其詞大怒飛朱符遣役以黑索縋屠至屠爲役挾之疾行氣促而汗渴痰上冲急切不能語宰約略訊問卽拍案詈曰個男兒果惡貌當橫於鄉里者不懲且爲患飛錢擲階石鏘然答之兩役卽牽屠伏地褫其衣而竭力以答答已百下屠方能言而宰已退堂傳語逐出矣始負痛回肆虎已坐索肉與酒無已與之乃烹肉煮酒牛飲狼餐老饕大樂焉直刺某公改裝貌作筆賈至其家遣役縛之去登堂皇訊之曰刺史聞汝虎名久矣刺史乃今日之卞莊也爾虎知之否虎從容曰詩云矯矯虎臣易云大人虎變如公方值是虎某不過艸茅下士一鹿豕羣耳虎何敢當直刺笑遣之虎竟無恙

慎儂氏曰訟則終凶捉刀人靡有不身敗名裂而此公以虎名獨無恙者何與緣性能侃直遇不平則起否則已耳噫何黨中無善士哉此篇當與前錄賣兒田叅看

粉郎

郁生名炳南字雲卿吉安三顧山人幼失父隨兄嫂以居兄殂喪嫂惡其游蕩不習商賈惟日逐無賴子游性嗜博奕神魄昏迷故屏逐之不與以顏色一日偶詣嫂處索飲食舉步至廬陵城尋狎友不遇殘衫破帽煢煢獨行忽一香輿粼粼而至中坐一好女子珠冠繡襖儀態萬方粉黛之香遠透鼻觀櫻口嚼紫檳榔塊置掌心藉暴秋陽玉笋纖纖胭脂點點襯映極妍生尾之行遽攀朱輪就美人手中攫其口澤而吞咽之美人微笑似不以爲侮倏忽之間車已去遠夜夕僑宿於邑之廢寺中煢煢

瓦檠燈將藉藁僵臥默憶美人嬌態且不怒己之儂薄未免有情正描繪間忽胸膈作逆嘔出晨餐及檳榔渣滓狼藉滿地衫袖沾濡心頭猶衝突不已再嘔之則津液帶血頭目炒搖耳際忽聞玉佩丁冬香輿之美人已翩然入闥後隨一婢亦婉孌絕倫生默揣當由己之無禮致干薄譴毒物誤吞目前美人必神媛來興問罪師者伏地叩謝自陳愧悔乞貸殘生美人笑曰子勿怖我仙人也子之嫂氏惡子非人已研白砒石雜晨餐食子矣我因舍妹終必偶子故以檳榔爛嚼和以津唾與子吞之曲爲醫治否則子登鬼籙尙望生耶卽不然街衢無禮能恕子耶所唾急宜掃除棄之溪水恐貓犬食之誤傷物命生始悟仙人之援己也再拜曰不肖之軀側立無地投止無門未識何所終極求仙人指南曰子當往燕臺或有奇遇且得佳人然宜痛自



改悔違則殆矣又再拜曰條條一身絕無資斧如何長征曰已爲子籌之矣指庭前英石峯曰此下掘寸餘卽得些須物聊以贈行因感謝曰倘有寸進不爲媿氏白眼當以香花奉祀仙人乞示姓氏曰白雲英也言已綵袖一拂艷質杳然生益驚駭晨起潛覓石峯下物掀箬苔寸餘卽得白鏹一笏約五六兩因揚言於廬陵市上曰郁雲卿亦鬚眉男子耳奈何不自立乞食婦人無地容身乾坤皆窄今長往矣不乘高車駟馬誓不還也人問何所之曰浪跡萍蹤因風飄泊無所駐亦無所不駐卽已耳明日隨計車徒步北上默遵仙人諭言初至京華毫無棲托腰纏中物漸漸空矣乃於廬溝橋上爲人測字口得百文或數十文藉以苟活旋有驗者爭道其神遂又入內城仍以測字爲業每日携紙墨坐裝潢鋪門首刻苦節省旅費頗充年餘竟積

聚白銀百金卽寄存鋪中不索子利一日鋪主出門鋪夥某某亦時與之傾談偶有舊家某以舊畫一幅詣鋪託售者展閱之絹本凋容顏色黯淡夥笑云此可飽字紙籠賞鑒家無所用之生在側偷睨其款識乃墨戲雲龍尾押所翁二字朱印西鱗東爪活潑如生心賞其非贗本問需值幾何某云先世珍藏急售亦非百金不售夥却之生殷殷與之訂五十金某曰可卽澆夥以所寄者與以半某去夥以爲妄生亦不語託代爲裝池籤云寄售懸壁上月餘無問價者一日又有以潑墨山水小幅來售者生見其氤氳濃厚必是大家細閱其題跋乃房山高尙書得意筆也而紙本亦破碎已極生又以五十金買之同前畫并售次月鋪主人回見壁上寫生驚爲至寶問何來夥以生對問幾何曰兩共百金郁先生年餘血聚之資盡罄矣主人大驚喜曰

不圖郁君能具精鑒卽邀之晚餐曰向誠肉眼不識雅人今願奉屈代收舊書畫歲奉辛資百兩壁上二幅爲代售之當以二百金奉子餘莫問也生大喜卽主於其家明日主人携畫走朱門數處卽得五百金果以二百歸生且代爲營運由是衣食豐足不似從前之落拓風塵三餐常不足矣年餘主賓相契莫逆於心卓午小坐肆門突有官車飛至俊僮三四揚鞭後隨車中坐貂裘美男子見壁上書畫有顧虎頭絹本美人一幅睨之甚佳叱輿駐索而閱之生以畫又取至輿前虔惕呈閱輿中人問值幾何曰千金耳彼笑曰蘇臺活蛾眉亦不過二三百金卽爲善價畫中愛寵影裏情人乃如是之昂貴耶曰鄭袖之在房也不過香曇一霎崔徽之入畫也可以金石千年况復妙畫通靈頓覺之絕少真蹟香軀叫活韋安道方是替人卽二千金猶以

爲少僅區區者貴人尙以爲昂耶因與言定八百金即卷而袖之曰明日遣小官送值來方欲咨問而鞭影橫斜怒驟騰蹕輿已遙矣夥某本妬其遽安樂至是益埋怨曰貴人伊誰汝識之耶曰不識曰子旣茫然奈何聽其攫去輦轂入海冠蓋如雲子將從何處索其值恐彭祖壽考之數成子虛矣生亦驚惶潛訊諸市人曰此某王也邸在某斜街西畔生默誌之候三日竟杳然乃徒步詣某王邸見門首坐髀腹健兒三四輩皆虎其貌者稍與問訊渺如不聞少頃日影移午門內傳餐健兒陸續去生乃逡巡入其門視院宇果雄麗無比再進數重闔則雕梁峻宇粲若畫圖西壁有小花磚耳門朱扉半掩潛瞰之繡幕翻階錦石疊岫修竹叢繡露卵石小逕宛似羊腸石字雕欄回文綺閣生知是園圃潛由曲逕抵一六角枕山亭有男子正撫几與門

下對奕王也生稍近其肩王甚躊躇正以一子不甚安詳恐誤落即負生鬻觸所好即小語之曰王曷不投某處一子即反敗爲勝誠譜所云王積薪奪幟法也王大驚喜問客從何來乃屈膝云小人索虎頭畫值來者曰我幾忘之即呼一僮至命以八百金且送至肆留客作壁上觀須臾收局王果勝益喜問汝亦工此耶曰幼在鄉里不過略習手談其實未能精也王曰曷同我一決楚漢生謝不敏堅命之不能却黑白一枰竟如王意因邀筵宴始訊及鄉貫姓名生曲折自陳詞意溫婉王即命生辭鋪主而就館於藩居由是得與王共朝夕着棋之外更爲之鑒收藏論今古出入尊馬奕若縉紳王偶游名勝必載生以隨刻不相離如形影焉一夕王入直侍上方宴三更未回生獨處然銀缸閱書史忽聞窗下有彈指聲啓視一中年婦紅裙繡履服

飾亦華間生曰郁先生西江人耶曰然曰何郡縣曰廬陵婦遽掩入坐而小語生曰王有第九妾翠英娘子亦吉安郁氏自幼鬻於邸中向無母家人芳年一十有七已寵冠專房而時時掩泣自怨形影孤單妾即翠娘身畔心腹人今聞先生至亦郁姓且同鄉故願暗遣來起居約相爲兄妹必不負也先生第僞與王言當可覩面生云從何識之以堅其信曰翠娘每喜懸一白玉鴛鴦珮四圍綴冬珠十數粒下懸小珠如菽者作纓絡以歷繡襟此可憑驗問翠娘何貌曰貌極美描寫殊難第十二金釵就中翹翹立艷幟者是也生乃謹誌於衷明日王歸生談次屢唏噓王問生有何心事大不了而愁苦如斯生乃垂涕自云幼有小妹七歲時出看燈棚誤爲匪人攫去後聞鬻於山左又云近在京都傳聞恍惚小妹若生此時想已年十七矣第不識手

足有會晤時否言已頗扼腕王審度移時曰我小星輩中却有一郁姓者嘗自云西江產但汝能自識得方信汝語不然終有譌生云兄妹雖久別然其龐似母見卽辨依稀班超固自識大家左芬當亦知太冲也王乃盡以姬出一堂濟濟翠繞珠圍生見儔人中有極美而鴛佩當胸者遽持其袖哭曰妹在是也翠英亦呼兄大慟王爲之動容曰昔爲吾賓今爲吾戚矣命上下呼之曰郁氏舅益邀王寵時導之入宴翠英繡房賞賚無算居二年生動歸念翠英乞王爲營一外職榮鄉里明日果索履歷去日未移晷已納資爲司馬大夫矣拜辭先一夕翠英携前婦至與之話別曰假骨肉聊慰旅情然由是儕輩不致齒冷皆君賜也旋有兩婢舁二木箱至封鐫甚嚴曰區區不腆之儀俾壯行色將之去一生吃著不盡矣洒淚與訣晨趨玉置酒饌中堂

厚况隆情不可罄述問生曰君年而立尙守鰥耶願以一婢爲贈生拜謝遂行果有一車隨之後至旅館啓甍帷一艷色女子冉冉出粉面團團與昔在廬陵所見白雲英相伯仲同來老嫗云此卽王所贈之佳人也生大喜握手問姓氏女自云白氏小字雲貞亦幼鬻王家者素得翠芙蓉娘子憐故得以隨君去生卽解橐中途賃館舍行合卺禮私以故鄉遇仙人白雲英事詳告於女女云有是哉妾父曾狎一狐婦將十年育一女名雲英狐母去而姊亦旋杳郎所遇者果是宜其援也生至是始服狐女能先知焚香遙叩謝蹇修焉過回吉安啓箱視之皆金珠寶玉鬻之遂成巨富雲貞事夫尤篤伉儷惟越兩載而不育生頗憂之雲貞齋沐乘香輿往朝武功山神求賜石麟俾延嗣續歸途聞草中有呱呱啼者覘之一錦襪裹一嬰兒眉目如畫雪膚瑩



然囊一碧玉箋書云吾妹得嫁妹情得官皆姊所心喜者也姊  
息靜深山誤墮塵趣月內產一嬰孩名曰粉郎山中苦無位置  
願吾妹拾而代撫育之長成卽爲妹嗣兒多福澤必振家聲祇  
續之情類我之喚幸勿棄擲有負蹇修珍重餐眠不盡欲言阿  
姊雲英手書雲貞喜出非望抱持而歸備乳媪哺之遂有子仍  
其名曰粉郎

懊儂氏曰一技之長遂由貧而富由富而貴得佳麗擁嬌兒在  
昔辭鄉就道之時所萬萬意念不及者耳噫人之於技又安可  
忽乎哉

### 三十六雷山人

竹西之東有巨鎮曰仙女廟相傳在昔康杜二仙女棚棲於此  
苦河道久迂舟楫已斷仙召白龍開濬成大渠又苦疾疫流行

死者相繼仙召藥王施神水活萬人釵笄靈蹟土人祀之遂以名鎮長河一泓客舟最夥嘗有巢州弄楫某是日小臥船頭藉日曝背突大風西來隣舟櫓棹竟蹶然傾折斷木粗如甕鷲擊某首首爲碎倒臥昏暈血湧如紅泉隣舟之子多人來瞰見某首已爲木削去其半萬難復生惟心頭尙溫急切莫救岸上觀者將至百人亦皆咨嘆莫展一籌忽有甯海縣人某亦久泊於此者是時正携壺賞酒將歸舫青鞋布襪羊裘氈巾遠遠而至意態極閒衆見其來遽歡呼曰三十六雷山人至矣因擁而告之且求其施勅勒賜再生蓋某素工符咒活人甚多人呼之爲三十六雷山人者實山人自道耳山人知不可却以酒澆人送之回緩緩登舟於血泊中覘某面目已模模糊糊不復辨認曰傷重哉恐難速效衆哀之曰山人乃生死人而肉白骨者某干

里孤身備於舟主倚蒙盡力亦大陰功山人命取甌來洗滌極  
潔而後汲河水使滿載指咒移時喃喃不知作何語視水漸凸  
起如水晶毬山人喜曰是尚可救也又咒移時口吸而噴其面  
血頓止水盡赤又吸而咒之再噴再咒某之面目始辨傷亦分  
明命取椰子瓢至補左額之缺中實以來其渣滓所以代腦漿  
外包以白紙兩層所以補皮肉端正訖覆以布衾再對之咒約  
兩炊許忽聞衾底人漸作呻吟聲山人卽伏身舢板上滾躍  
而起曰愈矣啓其衾某之首已整瞠目凝視若久病始甦者而  
山人則汗流浹背氣喘吁吁想亦大辛苦也拂衣而去衆知其  
廉惟焚香羅拜呼以神君感謝而已某至夕卽支撐起坐飲噉  
如常自云方纔如夢寐魂魄無所適從由是痴愚不似從前之  
清醒視夥伴皆絕不相識生平所事無復記憶者視其狀若痴

若迷與人言語絀繆不可以理解或云人之聰明在腦緣腦漿  
流去腐渣終頑物也以指叩其左額尙登登作木瓢聲有歎客  
孔三與山人善問山人何所師承而靈異若是曰余台州人採  
薪至三十六雷山見石洞中坐一道者狀貌蒼古鬚飄飄若飛  
雪目閃閃若熒電余知其異人釋斧斤斲衣下拜呼曰仙師道  
者凝視久之曰子不能仙且授以符咒爲世人療病亦功德門  
中要務余拜云得師授亦佳道者引就膝下口授千餘言手畫  
千餘筆使余效之禱擊余背痛達心苗隨堅記不爽麾余去曰  
汝歸而簡煉揣摩越十日再至此十日果又往拜之曰弟子得  
仙師妙訣果驗與否曰法在必驗然子宜葢瓜方能神妙問云  
何日子於妻財子祿任缺一門者是也余大驚不敢任道者曰  
是卽不能驗矣且還我符咒又欲擊余余拜曰仙師神人不知

葢瓜之外更有他法否道士審度良久曰除非六日後再至此  
然慎無携一人來吾當傳汝訣余辭去屆時果又隻身往見道  
者另趺坐荒岩余攀援而上見卽跪而朝恭曰仙師曾許弟子  
以訣請踐前言矣道者笑云汝有人隨之同來能傳汝耶余回  
視身後對曰弟子身後并無一人道者大笑而起曰賀汝無不  
靈驗可以浪游湖海且結來生緣時余已有兩子月餘忽小病  
均殂喪緣身後無一人語卽誘之葢瓜也又語余曰到處莫留  
名但自名爲三十六雷山人莫受謝值莫炫己功莫誤傳非人  
莫救人不盡力莫因仇而不援種種皆大千神髓者違則雷霆  
擊其元慎勉旃言已道士竟手撥曰雲軒軒而舞齒然而笑舉  
臂而竦身隨飛登絕巘而去歸而試之竟如師語乃謹遵其誠  
實非矯情尤奇者鎮有瓦工某登廟之鷓吻失足墮庭石脛已

斷矣骨且粉碎不能及寸山人來削柳樹之柯以代長短符合  
投之血肉中而包以豆腐皮咒移時卽呻吟而起行步如常亦  
不過炊許時耳孔三又云山人每夜起向船頭焚香三炷奠茶  
一甌喃喃似與人語不知操何術也紅羊之歲金谿富室畢氏  
三世發而僅得一遺腹子名曰藕官美而慧年八歲矣賊黨至  
發倉卒遁藕官自塾中啼老蒼頭負之背負稜冉不得賊猝集  
刃蒼頭欲挾兒走兒大啼詈不絕聲賊怒斬之頸已殊矣棄骸  
於野有家犬守之得不爲烏鳶啄明日賊去發歸槍地呼天淚  
下成血行路者聞悲音亦莫不酸鼻哭暈昏昏若眠依稀夢一  
朱衣神秉笏策怒馬飛至隨行將士或執戈或荷戈戟或握筆  
或捧文書神下騎語發云爾子不至於死上帝因汝三世不食  
牛犬準爾子生然連續其首非三十六雷山人不可發云山人

何處乞神指迷神回顧指之曰綠樹村邊戴鐵帽者非與整甍  
視綠蔭沉沉果有一人得得來以釜覆其首綠山人僑於是鄉  
船爲賊焚資爲賊掠新自村鎮買釜方歸適經於此耳移心憶  
神語遽牽其襟哀哀乞救治山人視之急搖手曰我非神仙曷  
能爲力爰哀不已叩地有聲曰噫世無飛頭之國安有接骨之  
丹耶無已且爲汝勉竭其力時家人均已哭而至山人命取扇  
帚來祝曰淨君淨君涼友涼友淨君科頭涼友聚首斷者續之  
神方在肘祝已以藕官之首就其腔取草覆之然後左持帚右  
持扇四方招且呼呼且咒忽大聲喝遽釋其物望西而奔衆方  
駭詫聞藕官已呻吟呼痛少頃遂甦視頸上微有紅絲一痕竟  
聯貫焉明日以金帛往酬山人而山人竟由是逸去不知所之  
噫嘻山人以術治人絕不言謝尙悲喪明彼世之借神鬼以惑

衆假符籙以歛貧者又當如何也勸勤雖神敬而遠之之爲妙也

### 賽嫦娥

吳中黎生名明字東明不羈士也風神俊逸裙履翩翩年二十尙未娶閩里有賽氏女郎名曰月姑貌妍麗里之戚黨聞艷聲者呼之爲賽嫦娥云女父母早逝煢煢依姨氏爲活年十七矣猶往往艷粧立門首看大儺賽神生目逆而艷之歸倩媒妁通詞議將成旋悔謂女子公然以嬌鑿示人豪無羞澀態恐非貞媛是夜夢亡父讓之曰賽家兒非尋常椎髻人也傾國之貌與家之才兒奈何以皮相目之因口吟一絕云瑤璣妃子貌如花丹顆分明點臂砂一自赤繩親繫足石榴裙下有烏紗吟已遽拍其背而醒明日再以媒往女之姨詈云黎家牧牛兒何其可



笑賽嫦娥非街頭菜把聽人掀擲者也大怒麾之出生由是絕望病淹淹及月餘益頹唐獨臥蕭齋餐飲俱廢其從兄某宅與之近因連日無兩弟書聲走瞰之間病所由來生伏枕叩首哀涕直陳乞兄援手兄怒云某氏何其忍也當有以報之雖然必瞰賽氏女果有情於吾弟否旋呼媒來授意使再去成則當有以酬緣女之姨丈某爲生兄司會計者十年矣主賓亦頗投洽生之自謀某猶未曉兄囑令珍重慷慨以押衙自期媒媪名張畫眉者因其能言也是日又至汝姨家姨云畫眉想又爲黎家作說客耶張笑云措大直得饒一世誰耐煩與若苦糾纏婆子來送花樣於月姑耳視女臥繡榻尙未起張潛就之問曰姑姑忒嬌惰日高三丈尙壓着繡衾臥耶女顰蹙云夜來小病至今頭眩尙昏昏張與之軟語移時女忽携張手耳語曰黎家小郎

予怨我耶抑念我耶張得聞極言其相思之苦女云渠曷不再  
煩姥來張云渠之伯氏已爲之釋但得姑姑一信物伯氏卽爲  
媒而求益力矣女審度良久就枕畔拾一浣花箋手自封緘與  
張乞轉寄書生幸勿輕擲張袖歸示生生披覽未竟卽躍而起  
笑曰嫦娥有情不負我病箋云誰向銀河浣絳紗拋殘玉屑與  
丹砂女龍雌鳳傷離別願結人間並蒂花蓋闈中詠月句也宛  
然倒壘亡父夢中韻益信宿緣兄來同閱并告夢徵兄亦駭異  
卽召姨氏之夫來云世有黎東明而長貧賤者乎某亦首肯婚  
議始成爲之下玉鏡臺是年冬擇吉辰以綵輿迎娶而歸却扇  
筵開態益嬌媚定情之夕恩愛百端次年生棘闥又躓侘傺而  
歸女每晚篝燈紡績伴之讀至明春果以拔萃出仕爲金陵儒  
官博士女見其署冷於水官清似水每以首薪盤終不足以吐

氣生云案頭鮭菜雋味豐盈階上蝶衣吟情活潑居隣聖域此  
中不少俊人卿何薄之甚哉女云惜妾爲不權進士耳然憑妾  
才華阿翁夢語終當默助郎君生笑謝之而佻儷彌篤女最喜  
入儂婆小刹焚旃檀禮佛迦祈求麟子雨香庵老尼尤與女契  
鱣堂多暇生每策馬游六朝諸山翠梳携尊嘯詠忘返女不耐  
岑寂亦簪花傅粉艷服輕裾乘筍輿訪尼尼見其至必以茗芻  
香饌供養酒開缸面相與話楞嚴十種因緣一日正坐松寮僧  
俗對酌忽佛婆惶急來報云制軍夫人游山隨喜至此尼忽忽  
着黃袈裟擎牟尼珠悚惕出迎夫人已降輿升殿參禮天人及  
廿六應真金像尼膜拜和南夫人亦與之抗手問住持禪榻何  
所意在小憩息尼導而前驅惟兩慧婢隨之後其餘僕從行人  
均在外廂淪若茗女於斯時已暫匿他室因素與夫人無一面

耳夫人驚一抬首見案上設兩小箸酒霧尙騰荀香猶熾驚而却步疑麻尼無行是必匿男子婚宴者尼見其失色卽伏地自陳云適有黎教授妻室賽孺人來此姑以盃酌叙寒溫耳聞仙旆自雲中來忽猝未及收拾惟夫人察之曰渠何往曰小家兒女醜覷不工語言想怯見夫人姑匿之他處夫人恐其飾詞曰旣是教授妻有同官之誼曷邀之來一聚萍蹤尼諾果搜自曲闕拉之出見卽盈盈衿袵拜膝下桃腮帶赤杏眼微飭酒暈依稀幾如着雨海棠濃睡乍醒夫人遽携其玉腕端詳久之笑曰個位娘子我見猶憐然則外閭豔稱爲賽嫦娥者非與尼曰然曰早耳香名頃纔識面老婦眼福不淺哉卽命近肩坐女再三謙遜曰夫人尊前禮合侍立曰是真孺人之謬謙矣堅命之始拜而偃之香澤紛流遽透鼻觀珠光煥發欲射眼波因玩其眉

目如隱隱春山盈盈秋水玩其手足如笋芽削玉蓮瓣鈎金聽  
其言詞如乳燕呼晴流鶯唱曉夫人贊歎不休尼又重整錦茵  
再設金罍流女陪侍尼往來供食竭盡殷勤女以香帕潔尊滿  
斟綠醕跪而獻之夫人喜而忘情凝視之幾不能須臾轉其瞬  
尼從旁又力贊其能相莊工刺繡善筆札事事可人憐夫人問  
賢夫年幾何矣云兒夫年二十有三曰如此英年奈何遽就冷  
宦女唯唯夫人旋太息曰老身得夫主榮貴足慰平生所惜半  
百之年尚無掌珍之愛女流老矣竟有許多瑣瑣非兒媳所能  
調護者曾育一女又少殤至今親遺斂賸粉尙酸心也言已拭  
淚不已女百計獻媚始轉悲爲嬉已而自嘲曰老婦未免痴矣  
無些須福而妄思得如孺人而女之哉尼因撫掌曰娘子少孤  
常以失怙爲慟夫人若不棄曷收之作螟蛉小嬌娃夫人笑微

頷其首女會意伏拜而叩曰雲泥之隔宿世之緣娘之蔭兒之福也夫人喜極幾欲擁於懷加於膝自襪金腕釧代束之曰區區不覲奚足褻吾兒然佛苑奇逢何可無訂擲盃而起女與尼尾而送之再三珍重而車馬紛紛已風馳電掣爲之神駭目眩女歸署候至更深生始踏月帶醉歸兩僮扶之入倒榻卽眠晨起方欲詳告昨日事而同官某已折簡邀遊蔣山女獨居正對鏡理粧忽奴子闌報制軍夫人遣媪來迎媪入語女云夫人昨自城北回與制軍噉噉語終夜早起卽命中堂鋪紅氍毹燃兩畫燭遣奴來迓乞勿稽延女笑應之起更衣服珠翠盈其顛香屑實其烏携婢登輿卽詣節署甫登階視制軍已偕夫人彼齣此佩均鴈行立中堂女欲下拜制軍止之曰毋孟浪須靖來同爲禮方吉祥耳因笑謂夫人眼力甚佳誠不愧左家嬌女夫人

遺材官急以名刺召黎廣文時生方偕某至蔣子文祠材官蹤跡至汗流氣促示以刺卽速其回車問何事見召曰不知曰蟻蝨之吏得荷寵招何其鶻突某請勉爲一行卽引之己宅假己衣冠生乃策馬隨材官詣署延禧節堂乃尋常接見寮吏處生至此遽止步一僮傳語曰進至第二重乃退省處生又止僮仍傳語曰進至三重四重則綺窗畫閣華麗非常生萬萬不敢移步僮亦鵠立代生唱名忽霽然一聲屏風頓闕視制軍與夫人都公服立豔綸之角驀見其妻亦先在心惴色變痴如木雞罔知所措女慧心人急趨前告以所以然後冉冉導之入生琴裳徐步踈踏登堂手設兩座於正中肅二老坐而後偕女班聯而拜焉宛似初婚謁見外舅姑情狀制軍掀髯大噱夫人笑云好一對解語花惜官太卑耳制軍笑云是尙煩夫人之顧慮乎因

携生出遍召幕府及諸子姪而告之曰此卽吾家東床坦腹人也衆口贊譽謂既有水清合有玉潤多諛詞焉少頃笙管嗷嘈水陸雜進俊僕傳呼內堂家宴至夕一對鴛鴦鳳侶乘興而歸火炬雙雙照同白晝至學署中庭箱篋充牣滿前幾無插足處問何來曰制軍補陪粧奩者約之費幾巨萬翌起入謝又宴聚兼旬年餘竟以才幹保生縣令旋擢太守得銓浙之杭州囑其運運至官緣夫人戀女情深也生至是始服女果於石榴裙下浪得烏紗且愧且喜女笑云妾月之精也郎星之首也星借月光月不借星光耳明年制軍移節他省生不願遠征婉求履新涕泣與別臨歧賞賚又五千餘金女私以百金謝尼又創建大士閣爲夫人祝釐之浙果以內助多政聲浙之中丞某與制軍本同歲生保生升豸冠回首冷衙不啻霄壤時浙有名妓曰素



娟又曰能行白牡丹生每呼入豸署侑觴女欲籠絡之每見其  
至必賜以香帕汗巾珠翹釵鈿之屬一日偶乘輿出游經狹把  
門下妓出拜伏於地堅請夫人小憩左右方叱其妄言女曰無  
傷也即出輿至娟娘臥室飲酒聽彈琵琶唱楊柳枝亦學男子  
擲纏頭之錦無數狎客皆避月上始歸明日出千金納娟爲  
夫之小星入門得女寵憐惜久之謂女曰夫人誠視我如女兒  
亦當視夫人如母宅之中央下有窖藏可取也掘之果得大麴  
四圍覆磁甌數十頂鎮朱符緣妓本前觀察之婢親見其藏多  
金於此者後因觀察殂命遂遺失而已亦流落勾欄今以報女  
也時有工倚聲者爲之譜金釧緣傳奇

慎儂氏曰人之姻媿根於緣人之亨通在乎運運之至雖越禮  
猶是坦途緣之至雖敵國亦成美眷不然如賽氏嫦娥迎神賽

會公然以真面示人拜佛焚香不惜以雌龜出戶而以粉頭爲友入勾欄以嬉揆之閨訓可謂越禮極矣而黎氏子竟由茲顯達由此亨豐則不謂之非運與緣不可也談此事者口角生香津津樂道而究罔測其所以然者大抵皆不知若何爲緣若何爲運耳噫官如匏繫室似磬懸牛衣多涕泣之聲螺黛有淒涼之色不信侯門挾瑟竟有茲艷質娉婷任他補屋牽蘿毋輕損男兒志氣

蛇隔

吳中爲財賦之鄉閭閻大家巨室積產有數十萬畝者雲阡綺陌一望毗連意甚豪也而孽亦易積有孫姓名繼石者世居廣福鎮太湖之濱兩崦之隙皆其家沃壤崦之農凡與之田隣者多被其司事人逐漸侵削無已賤值售之俾彼成方園而司事

人亦藉飽欲壑有老儒方先生者亦隣也恐其佔自於陌上插柳枝思積久成林鴻溝有界司事者潛於深夜拔之棄湖水中而佔轉急方告其佃曰吾十畝地先人血產也頽軀既拙食指又煩恐捨此即殍矣鳩踞鯨吞若是吾當告爾主人佃目笑不甚理會年餘產已削其半方乃入城走詣於孫氏之門閭者皆司事黨羽不爲之通三謁三却復以牒投宰官署胥吏皆富家鷹犬反白眼施惡辭宰某亦不久稱貸於孫酬逋負者置不理方歸拚私與之鬧東臯秋穫司事者率拳勇數人來方纔動手詈於隴聲未已健兒已縛之於樹而糞填其口槌擊其臀肉幾脫得村殍救援始喘騰叫號而去由是益困憊每食必嘔吐醫者云是膈逆殆朝暮人矣方乃召其子孫曰吾自分必登鬼錄魂游墟墓徒延歲時然吾得病由爲孫氏冤抑不得申耳倩工

鑿吾棺須於醜和開一圓竇如蓋大吾必化爲巨蛇自竇中出  
飛噉孫氏一門老幼且盡目始瞑焉明日病益劇其子果遵所  
囑樽具不與人同而孫不知也適村媠來送新蔬私以方語告  
孫妻大驚急告於孫孫亦愕然以爲家雖豐與隣舍從無牴觸  
事方君怨毒何至於斯媠乃詳告所以孫不深信易敝衣潛往  
訪諸牧豎頑童之口無不與媠語符乃直詣方先生門其子孫  
見仇敵怒欲毆之孫云吾尋先生遺產來者謝罪來者非鬪毆  
來者不然敢以隻身來耶其子孫見其意良卽改顏拱立以老  
人病狀告曰令尊人之恙非歧黃所能治也乞導吾一面自能  
霍然如其語見卽叩首榻前曰先生憊至此不佞之過也今而  
後吾知勉矣乞先生自擇扎緩須臾方始則矐目視繼則喟然  
吁再則放聲大悲病已去其半孫卽坐於廳事呼僮僕以鞭策

來召惡何而遍撻之司事者咸叱辱而捩逐之卽聘其子爲司  
事以更之佔者退之數年之穀亦退之與方畝近者又割以贈  
之且立券以憑之呼里老書押以主之楚者呼號羨者贊譽媚  
者誇張人聲嗷嗷耳爲之聾忽屏後有扶杖呻吟而出者則方  
先生也孫揖語之云昔者無禮皆若輩妄爲然先生有過儒之  
譏僕亦有失察之咎旣明界址請釋嫌疑酒能合歡願以一尊  
爲先生壽方猶謙遜而孫已呼庖丁以酒饌來手奉一爵方飲  
之嚼嚼作聲息忽著然吐出痰塊裹血泡墮地有聲方昏然救  
始甦自撥痰中物視之則一小赤蛇已成形矣特目未啓耳由  
是病頓瘳且能飲啖如少年孫乃爲方界遍插綠楊而後去是  
夕召妻子而誠之曰甚矣哉怨毒之於人可畏也爲父以一時  
疎虞幾使常山率然入吾室宇嚙吾子孫流毒靡已噫嘻危哉

至今方村柳色雨絲烟縷綠如環城游舫聽鶯往往憩集村之  
媯說因果而尙有能記其事者余憶當年僧寮忍辱其時恨不  
爲蛇且爲常山率然之儔飛去仇家大嚼其肉方足以洩胸頭  
之憤噫怨毒之于人亦甚矣哉其事似在果報書中然筆以誌  
之亦可爲富而不仁者一龜鑑事同而筆墨不同也覽者諒之  
澳儂氏曰方之恩報復也懦而愚孫之能解釋也富而猾當其  
做衣謬訪病榻瀾留怨府既深毒物卽墮於胸次良嚙方吐靈  
虺忽躍於尊前銅臭之奴皆毫無知識懦弱之子能妄肆欺凌  
蔑蔑小言作西方解結咒讀諸佛菩薩皆聞而下窺曰善哉善  
哉如是如是

司徒如意郎君

司徒兼晉人也以孝廉出爲閩之某縣令初蒞任深衣大笠策

蹇行二百里程夫人早逝遺一子名曰如意隨以下澤車意頗  
爲苦孝廉叱之曰孺子不知物力難妄思作縣令兒圖快活耶  
果爾當投生洋商家不應產自措大門也縣之胥吏接新令尹  
不見咸惶惶而孝廉已岸然詣署繫蹇堂皇下闕者異而詢之  
曰吾庖代者也出文憑示之方信履任三日重門洞闢民有訴  
者許直達其前事無鉅細無隔宿不決獄民愛之呼曰司徒家  
翁公子偶出游民爭擁入己宅酒漿果餌以饗之曰此家翁兒  
也敢不供養孝廉每見其醉態醺然必與杖楚曰毋輕擾黔黎  
得罪蒼昊偶行隴畔課桑麻民有以糠粃煮雞黍稷供彘食者  
孝廉問民詭以己食對卽大劬曰蒼赤貧至此宰官之罪也大  
啖一甌而去人多笑其騷而轉愛其真明年夏苦旱孝廉科頭  
跣足捧香行烈日中爲民祈雨澤中酷暑病將不起呼公子而

論之曰吾死後宦囊蕭然汝甯棄吾骨徒步歸毋輕受民賻違則化厲鬼殺汝公子泣受遺訓及溘逝民爭哭於縣庭之門曰家翁家翁何棄吾民之速乎巷哭者三日野哭者三日釋道方外錚錚擊木魚諷佛號祝慈悲父生天幕賓檢其囊僅俸餘百金惟數斂身具餘烏有也乃權厝於邑之東山後之來者怒云司徒公矯枉過正徒沽一己清名累後人難爲繼邑之氓敢再以司徒語者笞一百且遣役速公子離境土恐搖民心公子哀涕盡貨其圖書卷軸得二百金煢煢走他那凡當道與孝廉同歲生者見以子姪禮咸加白眼語含譏彈年餘資罄貸無門遂落魄聞翁有門下士受恩植最重者傅姓名無私商於呂宋質庫有三新秋露冷縑經衣單無已趁海舶往訪之或得其資助藉甦涸鱗萬里汪洋海天若鏡蒲帆逕渡視蜃樓貝闕如在畫



圖及登岸訪傳居果縮戶朱扉峨峨甲第刺三投而不見一幡  
腹男子傳語云主人已於前月收肆回廈門矣郎君毋痴守也  
暇偶步街衢玩外邦風景見有錦衣策駿馬携艷妾三四并轡  
出游者矚之傳也公子怒氣填膺遽呼其名而數之曰傳無私  
負汝師乎背恩若此富何能綿傳攬轡笑云君言大謬余在內  
地僅一面老公何遽云慮乳臭子初學秋風客卽狂妄不值得  
餓殺耶卽以手中策撾公子首叫罵而去公子忍辱回逆旅慟  
憤幾不欲生泣云廉吏之兒竟不克死故國而乃斃遐方耶天  
厭廉吏毋乃甚乎逆旅主人名王黑者罵訊其姓氏愕然云家  
翁子耶我翁之部下民也曾爲盜翁杖我幾死越獄逸至此始  
得生公子貧困天終佑之請爲公子謀衣食公子大駭云君豪  
傑獨不仇當日之杖辱乎傳且背義子益魚肉我矣黑云不杖

爲盜杖卽爲民心德之敢仇之乎公子若疑請以曠日誓公子始安居其家然鬱鬱常不樂黑云此邦東郊有大沙乃外洋女子盤馬處爭奇競艷中國所無公子曷晨起往瞰藉遣悶懷公子請翌卽至其地甚空闊雄敞細沙鋪地芳草叢生千騎紛來羣芳溢至雌黃睛螭髮而秀色猶可餐也四圍觀者或華或西有毀有譽公子本中區秀彥是日立儔人中負手聳肩俊目流盼雖冠裳黧淡而粉桃雪映郁李珠輝誠不愧雞羣之鶴忽怒騎隊至覘之皆二八嬌娥擁一最艷者臂玉囊雲織眉畫頰粧束體態不類娃娃略一盤旋從人叢中見公子星眸輾轉凝注有情旋自馬背呼一長鬚奴耳語良久長鬚俯而諾卽徐步詣公子作華言婉訊踪跡公子略陳家世怖欲造回又來一短髻奴子偕之立長鬚者趨近嬌嬈格磔鈎斬不知作何語艷者啓

櫻微笑又耳語少時略馳騁盡能事卽合圍而西公子逡巡欲  
歸兩奴堅請隨往乞少從容云是大好事他人萬萬求之不得  
者子毋怖焉旋一御者以馬筆授之強使登騎結隊而驅少頃  
達一處五光十色炫爛繚曲皆三層畫樓導而登其顛華麗無  
比貼地皆錦茵罽戶皆繡幄鑪烟篆於鼎鐘韻鏗於牆一美女  
子端坐於榻諸美婢環侍無敢睥者視之卽馬上所見之最艷  
者也年可十五大神光離合流麗端莊見公子至盈盈起立拉  
其玉腕坐使駢肩左右以五尺許大鏡捧至偃而端詳熨貼萬  
狀一泓秋水中幾如鏤玉雕瓊雌雄雙峽也女帶笑頤示諸  
婢命與生澡浴卽有侍兒引之曲房杞菊搗三朮塗以香澤起索  
舊衣云已棄之矣另有垂髻小女子捧新衣巾與之更着非  
羅非縠膩滑溫柔且修短適符尺寸合度一若稱體剪裁者導

之出正中已開筵宴玉笙之音嫋嫋銀炬之燄煌煌器具精良  
鋪陳炫爛女亦豔粧出與生交拜然後促膝并坐侍女皆冉冉  
拜於尊前若朝叅禮公子欲起立女笑止之樂數闋肴核滿前  
有生平耳目所未經者然皆珍錯雋味酒紅色如胭脂亦極甘  
冽女每舉觴必飲公子以半而後自飲每執匕必嗽公子以半  
而後自嗽進三四爵公子自陳書生量窄恐稍縱損威儀女媚  
而強之飲已玉山頽然頰暈紅潮如雨後桃花鮮妍欲滴女曰  
人云上國多俊男然如郎君美者恐亦不多觀公子唯唯自云  
身在異域如梗泛萍飄頃荷深情賜以盃酌蓮漏已促乞放小  
生歸或良晤有後期也女笑云郎君邂逅實是宿因旣已天風  
吹來忍令其復吹去耶海東畫眉女非噬人者耶何怖之甚哉  
樓下樂工歌聲哀怨聞何名曰此味離塊禁之聲也樓上舞女

十六人又聯臂折腰如秋藥翻風垂楊拂地問何名曰此水殿  
拋毬戲柔魂蕩魄心旌若搖公子醺然頰首枕女之香肩女顧  
婢笑云郎君倦矣可以寢乎歌舞止卽有三四嬌鬟雙雙扶入  
畫闥龍涎細蕪雀舌漫斟絮語喁喁蘭心脉脉幾疑人間琴瑟  
無此奇緣除非天上薦羅有玆佳遇聽階上銀籥三擲矣促其  
濃粧却卸解衣入帷曲盡燕婉女於枕上詳詢游踪公子一一  
陳答女云郎旣無家且小住壻鄉免傷旅寂緣至卽聚緣盡卽  
散毋戚戚也公子又詳訊女女不答但云妾是忉利大王女修  
羅小妹不惜梯航來買無價寶者總之郎得美婦妾得美夫於  
愿足矣問訊何爲難再唱公子微醒患口渴帳外卽有雛婢以  
玉盃進啣而甘之味微苦澀疑是葳苓戲吐餘瀝以飲女女以  
鸚舌攪入口中心旌大動又乘之女丐郎徐徐云妾猶處子也

毋謂海濞嬌蕩而能任狂風暴雨者晨興揭帳侍女給奉殷勤  
視案頭雅玩皆珊瑚木難火齊貓睛寶石之屬俄頃女起坐玉  
鏡臺畔兩婢來爲之櫛髮長能委地光可鑑人盤梳雲髻名曰  
靈蛇簪以嫩蕊繁葩翠鈿珠朶略施粉黛香風襲人繫以鵝黃  
蝶裙襲以鶯花鶴氅一婢進云中地尚赤耶君嘉禮之次晨奚  
可以縞袂不吉女首肯爰更淺絳色芙蓉之裳深碧琅玕之襖  
一檢腰肢臨風欲化早膳畢相與携手倚樓畔瓊窗東望渤澥  
並笑指門外沙堤云此是耶君來路也公子亦旁覘孔道曰其  
東畔一綫沙磔茫茫非卿試馬處耶女亦粲然由是與女同居  
錦衣玉食足傲王侯惟出入經行均嚴監守間有零星寶物欲  
袖而藏之靈敏慧婢欲盜而私之女均不許謂窮措大終是眼  
饑惟日坐香閨與女填詞賦詩藏鈎射覆藉遣良宵一夕坐燈

下檢閱案頭書籍得中國朝報一紙內云閩之紳士繼請聖恩願以前令尹司徒彙崇祀名宦刻奉諭旨許於該邑建廉吏祠香火百年公子閱竟大悲勸誥一身淪落久滯海邦不知老父枯骸何日返鄉關尋馬鬣茫茫天地俯仰皆虛命如斯夫女聞之亦沈瀾曰郎必有此一段因緣俾世人知廉吏尙可爲也別亦有時少安毋燥女有心腹婢二一曰宜愛一曰宜順玉貌花顏亦非凡艷每蹈隙與公子狎昵女似知之而聽其所爲次年中秋前二日金風微動紈扇乍捐兩婢潛告公子云娘子昨得家報眉黛含顰似有悲態想不日唱柳枝矣郎君宜曲意事之或得其援手大可療貧然幸毋洩吾二人語明日女果督婢理琴書篋箱篋搬運終日男婦皇皇至夕嚶嚶一聲仍於正中設宴拉生同坐離然黯黯緒纒下笙管嗷嘈女禁之曰驢駒在耳聽

之皆傷心聲也言已珠淚縷縷墮入酒盃中舉以飲公子公子  
泣下二婢亦涕不能仰詫問何故女云年餘伉儷羈縻何殊一  
旦分飛天涯目斷是以悲耳公子問卿去有重晤時乎女掩泣  
搖纖手示以不能鳴咽之音淒入肺腑自起舞陸離之劍溜瀉  
頓挫可以抗公孫而藐談容矣舞已又扣劍而歌曰山有木兮  
水淪漣妾遇郎兮宿世緣棄郎歸兮妾何所天海波浩渺兮空  
無邊無邊兮無岸茫茫萬里兮音書斷願郎珍重兮毋思念歌  
罷擲劍而啼旋有長鬚奴子跪階下云舟楫已備請女郎啓行  
視天已嚮晨女與公子交拜訖殷殷挽公子送之公子有難色  
女云妾欲携郎歸恐有翼亦難遁也然實無位置處不過親與  
判袂藉表痴情且有持贈郎無怖也可卽携手出門諸婢均急  
裝燦如各控絲繯鵠立以俟女與公子聯騎瞬息達海壖果巖



有嫁龐巨艦三四女携公子登其一泣謂公子曰妾女王國丞  
相希拉赤花女也幼奉母訓習華語讀華書所以至華者意借  
靈秀種子瓜瓞克綿自奉裳衣姪已三月昨得母氏手書促卽  
返國勢難逗遛迄今于歸從此分別永無見期除非夢魂見妾  
顏色妾名多羅婉殊小字珍珠雲郎郎可歸則歸不歸此邦亦  
不患無噉飯處因袖出一象牙小圓盒子代包繻帕牢繫襟頭  
曰郎毋輕擲持此往某肆示執事者方知其珍郎請歸休千萬  
珍重妾亦從茲逝矣長鬚者卽扶公子登岸是時心鏡昏迷如  
喪魂魄冉一回顧則砲聲轟震帆影飛馳霎時已遠海濤瀕洞  
水鳥嘔呀視女猶依稀立繻旗下玉質亭亭以帕拭淚須臾杳  
然公子不禁放聲而號急尋路歸逆旅主人仍黑也視之大駭  
問曰郎君何往瞬已二年累吾全家尋欲死公子詭詞以對仍

留餐宿禮貌不衰新雁來時酒醒孤館昨宵歡聚今夕淒涼出  
牙盒視之中嵌水晶片覆洋篆兩行若畫蚓塗鴉不能辨認思  
此藐小物無甚重輕未免美人給我影形單矣究竟茫無適從  
計不若畢命投繯隨老父於泉下意決卽解帶繫梁間甫登几  
套頸帶遽斷墮地有聲黑趨視之呼衆驚救云公子青年始十  
有九何遽尋無常上則辜負家翁下則貽笑海內爲公子計亦  
左矣然究竟兩年飄蕩何處願明以告我公子涕泣直陳黑云  
美人如此多情握別豈無持贈公子擲牙盒示之黑撫掌大笑  
曰公子幾誤戕其生瞬卽大富翁矣公子不知耶請放胆安眠  
準做猗頓石尉可預賀焉邇守至晨黑起送公子至肆其地在  
呂宋之西郊門臨東溟座落北岸重樓疊檻環植桑榆偉然巨  
觀也甫入門視其中華夥甚多似皆藐其寒素不甚與之周旋

黑岸然偕之登廳事甫坐卽有幹僕來問客公子訥訥黑代語之曰此司徒如意郎君頃自女王國希拉丞相家來勾當公事者且呼執事諭話僕諾而去少頃有甯波人汗面走出小與抗手坐公子以盒授黑而轉授之其人略審視卽肅然起敬出邀共事者五六十人奴僕一百餘人濟濟立階下擁公子坐廳之正面黑惟侍焉然後一一叅拜款宴旣畢簿籍橫陳其人云此間陳本子金共一百六十餘萬兩司事僕從均在是乞屈停主裁公子始恍然知牙盒卽肆主之左券也唯唯應之命一切仍舊夜夕眠黑於外廂宿公子內闈解衣褪寫無非艷姬承息聽聲另有俊价翌晨左右以冠服進視之煌煌三品階級問身未能貴皇家名器奈何假之甯波人云此間肆主例納資爲三品官以示尊貴袖出一紙呈閱已於昨宵三鼓驟得告身來矣其

神速如此公子因語其人云逆旅主人王黑德吾久矣可增其名入司事揣籍對曰如命王黑喜叩首階下有聲隣肆諸商聞公子係司徒家翁之兒布拉丞相之婿美人知己分越尋常爭折簡邀飲出則高車駟馬入則朱戶鎖窗自顧形骸誠如夢寐緣女家有三大肆一在滬一在廣一在寧波此則香粉私奩也概贈情人所以報兩年杵臼亦云厚矣月餘心憶亡父不置支朱提五千兩携奴僕車蓋回閩之某縣民見其騶從赫赫莫不以手加額曰此家翁公子也廉吏有報敢云皇天無老眼哉引之廉吏祠啓神帷而悲喜以告白叟黃童走送靈輿出百里外涕泣而歸公子如晉窳窳事竣重至海濱卽流寧波人主其事分資至閩另設巨肆卽以爲家明年公子年二十矣婚媾尙虛媒妁踵其戶均笑却之物色淑女絕少如南海美人旋聞傳無

私中途遇盜劫舉室遭祝融公子爲之大息忽王黑以大舫載一麗人來贈之云是無私愛女貨於途二百金購以奉獻所以復馬策過首之怒也公子笑曰子亦淺之乎視吾矣納爲小星旋娶名家女郭氏名珍珍者貌竟與美人相伯仲又娶四妾連醜女五矣均有殊色由是益讀書爲善上慰先靈是年秋竟以南宮籍捷北闈明春成進士給假回里絕無宦情惟坐享豐厚焉生又夫子十八人均貴後聞閩有水災自請於大吏願獨力賑之閩人爲之立小家翁之木主於廉吏之祠春秋祭賽聊以報處

慎僕氏曰司徒耶與海外嫵媚殆是宿緣不然叔敖之子貧且負薪廉介如司徒孝廉何代不有彼蒼者天安得人人而報之哉獨是海舶分襟玉人萬里東溟在望竟無起居一紙天外飛

來郎若有情從羅綺滿前金銀燭戶時當亦骨化石而淚成水  
矣拙鳩呼婦之聲尙堪入聽耶

又曰晨起攬鏡憔悴枯稿鬚髮漸霜自信無岳玠之顏容而妄  
意得蜃樓之富貴不亦難哉

賣高帽子

晉有長官某公貪黷喜投贈愛逢迎下寮有以珠玉玩好代芹  
獻者指顧得優缺性傲者不屑爲囊空者不能爲甘淪落傷匏  
繫者指不勝屈焉席帽山下某生素狡獪初以京職出爲晉之  
參軍抵省垣投芳版冠服來謁叩拜極恭詞意亦遜長官笑語  
之曰汝自內城來耶曰然曰京中無物不昂其值然究較外間  
美汝遠來必携有佳品是何艷名有何新樣可詳晰以告與生  
鞠慙對云下屬久處京華長安米貴旅橐不豐僅買得一頂高  
夜雨秋燈續錄

卷四

司徒如意郎君

賣高帽子

三十九

帽子峨峨若方山冠的是時式擬遍送大人先生聊代羔雁長官正色云貴廳未免失言老夫生平向不喜帶高帽汝不知耶生急承應曰唯唯否否靈臺乃聖賢之徒當與周召齊名范韓媲美如何喜着此切雲縠峨長官色轉霽掀髯大笑曰然哉此貴廳之能識老夫也雖然子既購來亦必售去沿途匝月能銷幾何矣生笑應之曰而今不足一百僅有九十九頂耳問何故曰適纔卽賣去一項與憲臺戴者非與長官爲之乾笑知是東方滑稽一流不敢輕視但飭其早履新譴官守而已而外間竟呼生爲出賣高帽子叅軍通衢婦孺無不知名餘俸旣豐宦派始足蛾眉之妾參於室兔尻之僮紛於前出必呵導乘輿入必持籌握算眼前富貴鏡裏榮華皆是高帽下求生活來者先是邑廟有無常使者泥像甚靈爲鬼雄嘗魅人使病具酒漿香帛

往謝病始已薙髮匠老秦之子乳名三小亦爲其所魅無已頂  
禮願爲其門下徒果獲鬼喜累同夢寐中相與周旋秦每夕得  
薙髮值必與其子市白酒牛肉往廟拜而後坐先敬其師已而  
自飲噉口喃喃與鬼師語似皆幽冥荒誕之事或果報不測之  
談也盤空尊竭而後歸一夕又至問酒甘乎像應之曰甘問肉  
美乎亦應之曰美是夜醉歸鬼卽隨其室其父夜夜問三小與  
鬼語或唱山歌或演官腔患之邀術士百計遣莫去一夜潛以  
美釀一瓶置三小臥室鬼至酌而甘之竟大醉眠鼻息鼾然矣  
竟現厥狀其父偷起視之白衣草履披髮被肩面色若靛僵臥  
若尸頭上高帽長二尺餘舉蕪帚痛擊之鬼醒持鐵奪門吼而  
奔其父遽攫其高帽冒手如蛛絲腥臊欲翻腸胃烈醜騰騰焚  
之殆盡鬼竟絕跡不敢復來其子竟得如常而叅軍署門首每



夕必聞剝啄聲聞者問則不一應啓則無所見叩月餘生怒夜起從門隙窺偵則一無常使者頂童童髮蓬蓬痴而立生叱之云老魅敢爾然則堂堂秦軍卽不能榜汝耶鬼應曰余誠知秦軍尊然吾帽爲秦家焚燬無此物卽不能勾人聞君家素以賣高帽得名乞售我不吝價也生曰去明當餽汝晨起僮工製一高帽大如式命闢者焚於廟其夜又至秦家闢闢萬狀三小竟終身皈依不敢萌侮師惡想

懷儂氏曰某生之得名也婦孺知之而鬼雄亦知之然後知峨其冠者在鬼固自信能勾人在人亦自誇能嚇鬼耳高坐堂皇喊聲雷震烏紗雕貴白鬚能沾其不爲薙髮匠攫而焚之亦幸矣哉

夜雨秋燈續錄卷四終